

摘藻堂四庫全書薈要

史部

欽定四庫全書蒼要卷六千四百七十八 史部

元史卷九十九

明翰林學士亞中大夫知制誥兼修國史宋濂等修

志第四十七

兵二

宿衛

宿衛者天子之禁兵也元制宿衛諸軍在內而鎮戍諸軍在外內外相維以制輕重之勢亦一代之良法哉方太祖

時以穆呼哩齊拉袞博勒呼博爾濟為四集賽領集賽台分番宿衛及世祖時又設五衛以象五方始有侍衛親軍之屬置都指揮使以領之而其後增置改易於是禁兵之設殆不止於前矣夫屬橐鞬列宮禁宿衛之事也而其用非一端用之於大朝會則謂之圍宿軍用之於大祭祀則謂之儀仗軍車駕巡幸用之則曰扈從軍守護天子之帑藏則曰看守軍或夜以之警非常則為巡邏軍或歲漕至京師用以彈壓則為鎮遏軍今總之為宿衛而以餘者附見焉

四集賽 太祖功臣博勒呼博爾濟穆呼哩齊拉袞時
號都爾本庫魯克猶言四傑也太祖命其世領集賽之
長集賽者猶言番直宿衛也凡宿衛每三日一更申酉
戌日博勒呼領之為第一集賽即伊克集賽博勒呼早
絕太祖命以博索部代之而非四傑功臣之類故太祖
以自名領之其云伊克者言天子自領之故也亥子丑
日博爾濟領之為第二集賽寅卯辰日穆呼哩領之為
第三集賽巳午未日齊拉袞領之為第四集賽齊拉袞

後絕其後集賽常以右丞相領之凡集賽長之子孫或由天子所親信或由宰相所薦舉或以其次序所當為即襲其職以掌環衛雖其官卑勿論也及年老既久則遂擢為一品官而四集賽之長天子或又命大臣以總之然不常設也其它預集賽之職而居禁近者分冠服弓矢食飲文史車馬廬帳府庫醫藥卜祝之事悉世守之雖以才能受任使服官政貴盛之極然一日歸至內庭則執其事如故至於子孫無改非甚親信不得預也

其集賽執事之名則主弓矢鷹隼者曰和爾齊實保齊
齊哩克齊書寫聖旨曰扎爾拉克齊為天子主文史者
曰筆且齊親烹飪以奉上飲食者曰博囉齊侍上帶刀
及弓矢者曰伊勒都齊庫特齊司閤者曰巴爾噶齊掌
酒者曰達喇齊典車馬者曰烏拉齊摩哩齊掌內府尚
供衣服者曰舒庫爾齊牧駱駝者曰特默齊牧羊者曰
和尼齊捕盜者曰和囉噶齊奏樂者曰浩爾齊又名忠
勇之士曰巴圖爾勇敢無敵之士曰巴圖其名類蓋不

一然皆天子左右服勞侍從執事之人其分番更直亦如四集賽之制而領於集賽之長若夫宿衛之士則謂之集賽台亦以三日分番入衛其初名數甚簡後累增為萬四千人揆之古制猶天子之禁軍是故無事則各執其事以備宿衛禁庭有事則惟天子之所指使比之樞密各衛諸軍於是為尤親信者也然四集賽台自太祖以後累朝所御鄂爾多其宿衛未嘗廢是故一朝有一朝之集賽總而計之其數滋多每歲所賜鈔幣動以

億萬計國家大費每畝於此焉

右衛 中統三年以侍衛親軍都指揮使董文炳兼山東東路經略使共領武衛軍事命益都行省大都督薩奇蘇驗壬子年已定民籍及照李璫總籍軍數每千戶內選練習軍士二人充侍衛軍并海州東海連州三處之軍屬焉至元元年改武衛為侍衛親軍分左右翼置都指揮使八年改立左右中三衛掌宿衛扈從兼屯田國有大事則調度之

左衛

中衛 並至元八年侍衛親軍改立

前衛 至元十六年以侍衛親軍創置前後二衛掌宿衛扈從兼營屯田國有大事則調度之置都指揮使

後衛 亦至元十六年置

武衛 至元二十五年尚書省奏諾海尼都以漢軍一萬人如上都所立虎賁司營屯田修城隍二十六年樞

密院官安巴奏以六衛六千人塔喇海布格所掌大都屯田三千人及近路迤南萬戶府一千人總一萬人立武衛親軍都指揮使司掌修治城隍及京師內外工役之事

左都威衛 至元十六年世祖以新取到侍衛親軍一萬戶屬之東宮立侍衛親軍都指揮使司三十一年復以屬皇太后改隆福宮左都威衛使司至大三年選其軍之善造作者八百人立千戶所一及百戶翼八以掌

之而分局造作皇慶元年以王平章舊所領軍一千人立屯田至治三年罷匠軍千戶所

右都威衛 國初穆呼哩奉太祖命收扎拉爾烏嚕蒙古諾海四投下以安扎爾博囉實訥忒伯爾克巴圖爾庫庫布哈五人領特默齊軍既平金隨處鎮守中統三年世祖以五投下特默齊立蒙古特默齊總管府至元十六年罷其軍各於本投下應役十九年仍令充軍二十一年樞密院奏以五投下特默齊軍俱屬之東宮復

置官屬如舊二十二年改蒙古侍衛親軍指揮使司三
十一年改隆福宮右都威衛使司

唐古衛 至元十八年阿實克烏蘇言今春奉使總領
河西軍三千人但其所帶虎符金牌者甚衆征伐之重
若無官署何以防閑之樞密院以聞遂立唐古衛親軍
都指揮使司以總之

桂齊衛 至元二十四年立

西域親軍 元貞元年依桂齊唐古二衛例始立西域

親軍都指揮使司

衛候直都指揮使司 至元元年裕宗招集控鶴一百

三十五人三十一年徽政院增控鶴六十五人立衛候

司以領之且掌儀從金銀器物元貞元年皇太后復以

晉王校尉一百人隸焉大德十一年益以懷孟從行控

鶴二百人陞衛候直都指揮使司至大元年復增控鶴

百人總六百人設百戶所六以為其屬至治三年罷之

四年以控鶴六百三十人歸于皇后位下後復置立

右阿蘇衛 至元九年初立阿蘇巴圖達魯噶齊後招
阿蘇正軍三千餘名復選阿蘇齊齊克齊拉衮集賽台
軍七百人扈從車駕掌宿衛城禁兼管潮河蘇沽兩川
屯田并供給軍儲二十三年為阿蘇軍南攻鎮巢殘傷
者衆遂以鎮巢七百戶屬之并前軍總為一萬戶隸前
後二衛至大二年始改立右衛阿蘇親軍都指揮使司
左阿蘇衛 亦至大二年改立

隆鎮衛 睿宗在潛邸嘗於居庸闕立南北口屯軍徵

巡盜賊各設千戶所至元二十五年以南北口上千戶所總領之至大四年改千戶所為萬戶府分欽察唐古桂齊西域左右阿蘇諸衛軍三千人并南北口大和嶺舊隘漢軍六百九十三人屯駐東西四十三處立十千戶所置隆鎮上萬戶府以統之皇慶元年始改為隆鎮衛親軍都指揮使司延祐二年又以哈喇婁軍千戶所隸焉至治元年置蒙古漢軍籍

左衛率府 至大元年命以中衛兵萬人立衛率府屬

之東宮時仁宗為皇太子曰世祖立五衛象五方也其制猶中書之六部殆不可易遂命江南行省萬戶府選漢軍之精銳者一萬人為東宮衛兵立衛率府延祐元年改為忠翊府未幾復改為御臨親軍都指揮使司又以御臨非古典改為羽林六年英宗立為皇太子復以隸東宮仍為左衛率府

右衛率府 延祐五年以詹事圖們岱爾所管薩勒奇諾爾萬戶府及迤東女直兩萬戶府右翼屯田萬戶府兵合

為右衛率府隸皇太子位下

喀喇衛 武宗至大三年定喀喇軍籍凡喀喇氏之非者皆別而黜之驗其實始得入籍及諸侯王阿濟格呼魯蘇所領特默齊屬喀喇氏者令樞密院喀喇衛遣人乘傳往置籍焉

忠翊侍衛 至元二十九年始立屯田府大德十一年增軍數立為大同等處侍衛親軍都指揮使司至大四年四月皇太后修五臺寺遂移屬徽政院并以京兆軍

三千人增入延祐元年改中都威衛使司仍隸徽政院
至治元年始改為忠翊侍衛親軍都指揮使司

宗仁衛 至治二年右丞相拜珠奏圖卜特穆爾叛時
没入伊奇喇斯人一百戶與今所收蒙古子女通三千
戶清州徹匠二千戶合為行軍五千戶請立宗仁衛以
統之於是命右丞相拜珠總衛事給降虎符牌面如右
衛率府又置行軍千戶所隸焉

右欽察衛 至元二十三年依河西等衛例立欽察衛

至治二年分為左右兩衛天曆二年以本衛屬大都督府

左欽察衛 亦至治二年立始至元中立衛時設行軍千戶十有九所屯田三所大德中置濟爾噶朗特古納兩千戶所至大元年復設四千戶所至是始分為左右二衛亦屬大都督府

龍翊侍衛 天曆元年十二月立龍翊衛親軍都指揮使司以左欽察衛騰吉斯等九千戶隸焉

虎賁親軍都指揮使司

左翊蒙古侍衛親軍都指揮使司

右翊蒙古侍衛親軍都指揮使司

宣忠俄羅斯扈衛親軍都指揮使司

威武阿蘇衛親軍都指揮使司

東路蒙古侍衛親軍都指揮使司

女直侍衛親軍萬戶府

高麗女直漢軍萬戶府管女直侍衛親軍萬戶府

鎮守海口侍衛親軍屯儲都指揮使司

宣鎮侍衛

世祖中統元年四月諭隨路管軍萬戶有舊從萬戶僧格西征軍人悉遣至京師充防城軍孟古岱軍三百一十九人嚴萬戶軍一千三百四十五人濟南路軍一百四十人塔齊爾軍一百四十九人奇扎爾軍一百四十五人馬總管軍一百四十四人三年十月諭益都大小管軍官及軍人等先李壇懷逆蒙蔽朝廷恩命驅駕

爾等以為已惠爾等雖有效過功勞殊無聞報一旦泯
絕此非爾等不忠之愆實李璫懷逆之罪也今侍衛親
軍都指揮使董文炳來奏其詳言爾等各有願為朝廷
出力之語此復見爾等存忠之久也今命董文炳仍為
山東東路經略使收集爾等直隸朝廷充武衛軍近侍
勾當比及應職且當守把南邊隄防外隙庶內境軍民
各得安業爾等宜益盡心以報勲效 至元二年十二
月增侍衛親軍一萬人內選女直軍三千高麗軍三千

阿哈三千益都路一千每千人置千戶一員百人置百戶一員以領之仍選丁力壯銳者以應役焉 三年五月帝謂樞密臣曰侍衛親軍非朕命不得發充夫役修瓊華島士卒即日放還 四年七月諭東京等路宣撫司命於所管戶內以十等為率於從上第三等戶僉選侍衛親軍一千八百名若第三等戶不敷於第二等戶內僉補仍定立千戶百戶牌子頭并其家屬同來赴中都應役 十四年五月以蒙古軍與漢軍相參備都城

內外及萬壽山宿衛仍以伊蘇布哈專領圍宿事 十
五年五月總管胡翔請召還侍衛軍先是宿州蘄縣等
萬戶府士卒百人有旨俾充侍衛軍後從僉省嚴忠範
征西川既而嘉定重慶夔府皆下忠範回軍留西道翔
上言從之九月以總管張子良所匿軍二千二百二十
二人充侍衛軍士 十六年四月選揚州省新附軍二
萬人充侍衛親軍併其妻子遷赴京師 二十四年十
月總帥汪惟和選麾下銳卒一千人請擇昆弟中一人

統之以備侍衛從之

成宗大德二年八月詔蒙古侍衛所管特默齊軍人子弟投充諸王位下身役者悉遵世祖成憲發還元役充軍 大德六年二月調蒙古侍衛等軍一萬人往官山住夏

仁宗延祐六年九月知樞密院事達實特穆爾言諸漢人不得點圍宿軍士圖籍係軍數者雖御史亦不得預知此國制也比者領圍宿官言中書命司計李處恭巡

視守倉庫軍卒有曠役者則罪之以懲其後使無怠而
已而李司計擅取軍數筭士卒在法為過臣等議宜自
中書與樞密遣人案之驗實以聞制可 七年六月以
紅城中都威衛係掌軍務之司屬徽政院不便命遵舊
制俾樞密總之

圍宿軍

世祖至元二十六年七月命大都侍衛軍內復起一萬
人赴上都以備圍宿

成宗元貞二年十月樞密院臣言昔大朝會時皇城外皆無牆垣故用軍環繞以備圍宿今牆垣已成南北西三畔皆可置軍獨御酒庫西地窄不能容臣等與丞相鄂勒哲議各城門以蒙古漢軍列衛及於周橋南置戍樓以警昏旦從之

武宗至大四年正月省臣等傳皇太子命以大朝會調蒙古漢軍三萬人備圍宿仍遣使發山東河北河南淮北諸路軍至京師復命都府左右翼右都威衛整器械

車騎六月以諸侯王駙馬等來朝命發各衛色目漢軍八百二十六人至上京復命指揮使伊克布哈領之

仁宗皇慶元年六月命衛率府軍士備圍宿守隆福宮內外禁門十一月樞密院臣言皇太后有旨禁掖門可嚴守衛臣等議增置百戶一員及於欽察桂齊西域唐古阿蘇等衛調軍士九十人增守諸掖門復命千戶一員帥領百戶一員備巡邏從之 延祐三年十月以諸侯王來朝命圍宿軍士六千人增至一萬人復命伊爾

根圖嚕分左右部領其事十一月詔圍宿軍士除舊有者更增色目軍萬人以備禁衛十二月樞密院臣言圍宿軍士不及數其已發各衛者地遠至不能如期可遷刈葦草及青塔寺工役軍先備守衛其各衛還家軍士亦發二萬五千人令備車馬器械俱會京都制可六年閏八月命知樞密院事忠嘉領圍宿發五衛軍代羽林軍士仍以千戶二員百戶十員擇士卒精銳者二百人屬之

英宗至治元年正月帝詣石佛寺以其牆垣踈壞命副
樞準台僉院阿薩爾領圍宿士卒以備巡邏八月東內
皇城建宿衛屋二十五楹命五衛內摘軍二百五十人
居之以備禁衛

文宗天曆二年二月樞密院臣言去歲嘗奉旨依先制
調軍把守圍宿此時各翼軍人皆隨處出征亦有潰散
者故不及依次調遣止於右翼侍衛及右都威衛內發
軍一千一百二十六名以備圍宿今歲車駕行幸臣等

議於河南山東兩都府內起遣未差軍士一千三名以備扈從制可五月樞密臣又言比奉令旨放散軍人臣等議常制以三月一日放散六月一日赴限今放散既遲可令於八月一日赴限從之

儀仗軍

世祖至元十二年十二月上尊號受冊告祭天地宗廟調左右中三衛軍五千人為蹕街清路軍

武宗至大二年十二月上尊號百官行朝賀禮樞密院

調軍一千人備儀仗 三年十月上皇太后尊號行冊
寶禮用內外儀仗軍數及防護五色甲馬軍二百人
四年二月合祭天地太廟社稷用蹕街清道及守內外
墻門軍一百八十人命以圍宿軍為之事畢還役七月
以奉迎武宗玉冊祔廟用清路蹕街軍一百五十人管
軍千戶百戶各一員九月以祭享太廟用蹕街清路軍
一百五十人千戶百戶各一員

仁宗皇慶元年三月天壽節行禮用內外儀仗軍一千

人

英宗至治元年十一月命有司選控鶴衛士及色目漢軍以備鹵簿儀仗十二月定鹵簿隊仗用軍士三千三百三十人萬戶千戶百戶四十五員仍議用軍士一千九百五十人萬戶千戶百戶五十九員以備儀仗

致和元年六月以享太廟用蹕街清路軍一百名看糶盆軍一百名管軍官千戶百戶各一員九月行大禮用擎執儀仗蒙古漢軍一千名

文宗天歷元年十一月親祭太廟內外用儀仗并五色
甲馬軍一千六百五十名仍命指揮青山及洪副使攝
折衝都尉提調二年正旦行禮用儀仗軍一千人享
太廟用蹕街清路軍一百名看守執盆軍一百名管軍
千戶百戶各一員天壽節行禮用儀仗軍一千名皇后
冊寶擎執儀仗用軍一千二百名軍官四員

扈從軍

世祖至元十七年三月發孟古忒綽爾齊所領河西軍

士及額勒赫麾下二百人入備扈從

武宗至大二年太后將幸五臺徵政院官請調軍扈從
省臣議昔大太后嘗幸五臺於住夏特默齊及漢軍內
各起扈從軍三百人今遵故事從之十一月樞密院臣
言去歲六衛漢軍內以諸處興建工役故用六千軍士
於上都臣等議來歲車駕行幸復令騎卒六千人備車
馬器械與步卒二千人扈從制可

看守軍

世祖至元二十五年十一月以軍守都城外倉初大都城內倉教有軍守之城外豐閏豐實廣貯通濟四倉無守者至是收糧頗多丞相僧格以為言乃依都城內倉例每倉發軍五人守之十二月中書省臣言樞密院公廨後有倉貯糧乞調軍五人看守從之

成宗大德四年二月調軍五百人於新浚河內看閘武宗至大四年六月帝御大安閣樞密院官奏嘗奉旨令各門置軍守備臣等議特默齊軍士去其所戍地遠

卒莫能至擬發阿蘇唐古等軍參漢軍用之各門置五十人制可

仁宗延祐元年閏三月隆禧院官言初世祖影殿有軍士守之今武宗御容於大崇恩福元寺安置宜依例調軍守衛從之三年二月嶺北省乞軍守衛倉庫命於綽哈所屬萬戶三千特默齊軍內摘軍三百人與之英宗至治元年增守太廟牆垣軍初以衛士軍人共守圍宿故止用蒙古軍四百人至是以衛士守內牆垣其

外塙止用軍士乃增至八百復命僉院哈克繖院判阿拉克特穆爾領之四月敕吹斯哉幹齊爾巴克實寺內常令軍士五人守衛

巡邏軍

仁宗皇慶元年三月丞相特們德爾奏每歲既幸上京於各宿衛中留衛士三百七十人以備巡邏今歲多盜賊宜增百人以嚴守禦制可仍命樞密與中書分領之延祐七年五月詔留守司及虎賁司官親率衆於夜巡

邏

鎮遏軍

仁宗延祐元年閏三月樞密院官奏中書省言江淞春運糧八十三萬六千二百六十石取日開洋前來直沽請預差軍人鎮遏詔依年例調軍一千名命右衛副都指揮使巴延往鎮遏之三年四月海運至直沽樞密院官奏今歲軍數不敷乞調軍士五百人巡鎮從之七年四月調海運鎮遏軍一千如舊制

鎮戍

元初以武功定天下四方鎮戍之兵亦重矣然自其始而觀之則太祖太宗相繼以有西域中原而攻取之際屯兵蓋無定向其制殆不可考也世祖之時海宇混一然後命宗王將兵鎮邊徼襟喉之地而河洛山東據天下腹心則以蒙古特默齊軍列大府以屯之淮江以南地盡南海則名藩列郡又各以漢軍及新附等軍戍焉皆世祖宏規遠略與二三大臣之所共議達兵機之要

審地理之宜而足以貽謀於後世者也故其後江南三
行省嘗以遷調戍兵為言當時莫敢有變其法者誠以
祖宗成憲不易於變更也然卒之承平既久將驕卒惰
軍政不修而天下之勢遂至於不可為夫豈其制之不
善哉蓋法久必弊古今之勢然也今故著其調兵屯守
之制而列之為鎮戍焉

世祖中統元年五月詔漢軍萬戶各於本管新舊軍內
摘發軍人備衣甲器仗差官領赴燕京近地屯駐萬戶

史天澤一萬四百三十五人張瑒格二百四十人解成
一千七百六十人竒扎爾四百六十六人實喇巴圖八
百九十六人扶溝瑪均努一百二十九人內黃特穆爾
一百四十四人趙諾海四十一人鄔陵實都爾古六十
五人十一月命右三部尚書克呼木平章政事趙壁領
蒙古漢軍於燕京近地屯駐平章塔齊爾領武衛軍一
萬人屯駐北山漢軍質子軍及僉到民間諸投下軍於
西京宣德屯駐復命克呼木為大都督管領諸軍勾當

分達勒達軍為兩路一赴宣德德興一赴興州其諸萬

戶漢軍令赴潮河屯守復以興州達勒達軍合入德興

宣德命漢軍萬戶悉赴懷來縉山川中屯駐三年十

月詔田德實所管固安質子軍九百十六戶及平灤州

劉布嚕魯所管質子軍四百戶還元管地面屯駐至

元七年以金州軍八百隸東川統軍司還成都呼喇濟

軍戍東川十一年正月以孟古岱等新舊軍一萬一

千人戍建都調襄陽府生券軍六百人熟券軍四百人

由京兆府鎮戍鴨池命金州招討使欽察部領之十二
月調西川王安撫楊總帥軍與和尼齊相合與綽哈鴻
和爾同鎮守哈達之城 十二年二月詔以東川新得
城寨逼近夔府恐南兵來侵發鞏昌路補僉軍三千人
戍之三月海州丁安撫等來降選五州丁壯四千人守
海州東海 十三年十月命布色岱呼必賚巴圖爾二
人為都元帥領蒙古軍二千人河西軍一千人守鄂端
城 十五年三月分揚州行省兵於隆興府初置行省

分兵諸路調遣江西省軍為最少至是以南廣地闊阻
山谿之險命特穆爾布哈領兵一萬人赴之合元帥達
春軍以備戰守四月詔以巴延阿珠所調河南新僉軍
三千人守廬州六月命荆湖北道宣慰使塔爾海調遣
夔府諸軍七月詔以塔爾海征夔軍之還戍者及揚州
江西舟師悉付水軍萬戶張榮實將之守禦江中八月
命江南諸路戍卒散歸各所屬萬戶屯戍初渡江所得
城池發各萬戶部曲士卒以戍之久而亡命死傷者衆

續至者多不著行伍至是縱還各營以備屯戍安西王相府言川蜀既平城邑山砦洞穴凡八十三所其渠州禮義城等處凡三十三所宜以兵鎮守餘悉撤去從之九月詔發東京北京軍四百人往戍應昌府其應昌舊戍士卒悉令散歸十一月定軍民異屬之制及蒙古軍屯戍之地先是以李璫叛分軍民為二而異其屬後因平江南軍官始兼民職遂因之凡以千戶守一郡則率其麾下從之百戶亦然不便至是令軍民各異屬如初

制士卒以萬戶為率擇可屯之地屯之諸蒙古軍士散處南北及還各鄂囉者亦皆收聚令四萬戶所領之衆屯河北阿珠二萬戶屯河南以備調遣餘丁定其版籍編入行伍俾各有所屬遇征伐則遣之十六年二月命萬戶富珠哩敬領其麾下舊有士卒守湖州先是以唐鄧均三州士卒二百八十八人屬敬麾下後遷戍江陵府至是還之四月定上都戍卒用本路元籍軍士國制郡邑鎮戍士卒皆更相易置故每歲以他郡兵戍上

都軍士罷於轉輸至是以上都民充軍者四千人每歲
令備鎮戍罷他郡戍兵六月碣門魚通及黎雅諸處民
戶不奉國法議以兵戍其地發新附軍五百人蒙古軍
一百人漢軍四百人往鎮戍之七月以西川蒙古軍七
千人新附軍三千人付皇子西安王命實喇特穆爾以
戍杭州軍六百九十八人赴京師調兩淮招討錫沙蒙古
軍及自北方迴特默齊軍代之八月調江南新附軍五
千駐太原五千駐大名五千駐衛州又發特默齊軍一

萬人及夔府招討張萬之新附軍俾四川西道宣慰使
伊克德濟將之戍鄂端 十七年正月詔以塔爾巴噶
守建都伯奇台守長河西之地無令遷易三月同知洶
東道宣慰司事張鐸言江南鎮戍軍官不便請以時更
易置之國制既平江南以兵戍列城其長軍之官皆世
守不易故多與富民樹黨因奪民田宅居室蠹有司政
事為害滋甚鐸上言以為皆不遷易之弊請更其制限
以歲月遷調之庶使初附之民得以安業也五月命樞

密院調兵六百人守居庸闕南北口七月勅更代廣州鎮戍士卒初以丞明巴延等麾下哈必齊軍二千五百人從元帥張宏範征廣王因留戍焉歲久多死亡者至是命更代之復以揚州行省四萬戶蒙古軍更戍潭州十月發砲卒千人入甘州備戰守十二月八番羅甸宣慰司請增戍卒先是以三千人戍八番後征亦奚不薛分摘其半至是師還宣慰司復請益兵以備戰守從之十八年正月命萬戶張珪率麾下往就潭州還其祖

父所領亳州士卒并統之二月以哈必齊軍三千戍揚州十月高麗王并行省皆言金州合浦固城全羅州等處沿海上下與日本正當衝要宜設立鎮邊萬戶府屯鎮從之十一月詔以征東留後軍分鎮慶元上海澈浦三處上船海口十九年二月命唐古特於松江州郡視便宜置軍鎮戍及諭鄂州揚州隆興泉州等四省議用兵戍列城徙濶東宣慰司於温州分軍戍守江南自歸州及江陰至三海口凡二十八所四月調揚州哈必

齊軍三千人鎮泉州又潭州行省以臨川鎮地接占城
及未附黎洞請立總管府一同鎮戍從之七月以隆興
西京軍士代上都戍卒還西川先是上都屯戍士卒其
鄂囉皆在西川而戍西川者多隆興西京軍士每歲轉
餉不勝勞費至是更之二十年八月留蒙古軍千人
戍揚州餘悉縱還揚州所有蒙古士卒九千人行省請
以三分為率留一分鎮戍史塔爾琿曰蒙古士卒悍勇
孰敢當留一千人足矣從之十月發乾討虜軍千人增

戍福建行省先是福建行省以其地險常有盜負固為亂兵少不足戰守請增蒙古漢軍千人樞密院議以劉萬努所領乾討虜軍益之二十一年四月詔潭州蒙古軍依揚州例留一千人餘悉放還諸鄂囉十月增兵鎮守金齒國以其地民戶剛狠舊嘗以漢軍新附軍三千人戍守今再調特默齊蒙古軍二千人令雅爾哈率赴之二十二年二月詔改江淮江西元帥招討司為上中下三萬戶府蒙古漢人新附諸軍相參作三十七

翼上萬戶宿州蘄縣真定沂郟益都高郵沿海七翼中
萬戶棗陽十字路邳州鄆州杭州懷州孟州真州八翼
下萬戶常州鎮江潁州廬州亳州安慶江陰水軍益都
新軍湖州淮安壽春揚州泰州弩手保甲處州上都新
軍黃州安豐松江鎮江水軍建康二十二翼每翼設達
魯噶齊萬戶副萬戶各一人以隸所在行院 二十四
年五月調各衛諸色軍士五百人於平瀨以備鎮戍十
月詔以廣東邊徼之地山險人稀兼江西福建賊徒聚

集不時越境作亂發江西行省呼圖克特穆爾麾下軍
五千人往鎮守之 二十五年二月調揚州省軍赴鄂
州代鎮戍士卒三月詔黃州蘄州壽昌諸軍還隸江淮
省始三處舊置鎮守軍以近鄂州省嘗分隸領之至是
軍官以為言遂仍其舊遼陽行省言懿州地接賊境請
益兵鎮戍從之四月調江淮行省全翼一下萬戶軍移
鎮江西從皇子托歡士卒及劉二巴圖爾麾下萬人
皆散歸各營十一月增軍戍咸平府以察罕伊爾蘇克

言其地實邊徼請益兵鎮守以備不虞故也 二十六
年二月命萬戶劉得祿以軍五千人鎮守八番 二十
七年六月調各行省軍於江西以備鎮戍俟盜賊平息
而後縱還九月以元帥諾海麾下軍四百人守文州調
江淮省下萬戶府軍於福建鎮戍十一月江淮行省言
先是丞相已延及元帥阿珠安塔哈等守行省時各路
置軍鎮戍視地之輕重而為之多寡厥後孟古岱代之
悉更其法易置將吏士卒殊失其宜今福建盜賊已平

惟荆東一道地極邊惡賊所巢穴請復選三萬戶以戍
守之哈喇岱一軍戍沁海明台伊奇哩一軍戍溫處扎
呼岱一軍戍紹興婺州其寧國徽州初用土兵後皆與
賊通今盡遷之江北更調高郵泰州兩萬戶漢軍戍之
揚州建康鎮江三城跨據大江人民繁會置七萬戶府
杭州行省諸司府庫所在置四萬戶府水戰之法舊止
十所今擇瀕海沿江要害二十二所分兵閱習伺察諸
盜錢塘控扼海口舊置戰艦二十艘今增置戰艦百艘

海船二十艘樞密院以聞悉從之 二十八年二月調
江淮省特默齊軍及漢軍二千人於托歡太子側近揚
州屯駐 二十九年以咸平府東京所屯新附軍五百
人增戍女直地 三十年正月詔西征特默齊軍八千
人分留一千或二千餘令放還皇子鄂囉齊大王珠卜
言切恐軍散釁生宜留四千還四千從之五月命思播
黃平鎮遠拘刷亡宋避役手號軍人以增鎮守七月調
四州行院新附軍一千人戍松山

成宗元貞元年七月樞密院官奏劉二巴圖爾言初鄂州省安置軍馬之時南面止是潭州等處後得廣西海外四州八番洞蠻等地疆界闊遠闕少戍軍復增四萬人今將元屬本省四翼萬戶軍分出軍力減少臣等謂劉二巴圖爾之言有理雖然江南平定之時沿江安置軍馬已延阿珠安塔哈阿爾哈雅阿婁罕等俱係元經攻取之人又與近臣阿爾婁博囉等樞密院官同議安置者乞命通軍事知地理之人同議增減安置庶後無

弊從之 二年五月江淞行省言近以鎮守建康太平
保定萬戶府全翼軍馬七千二百一十二名調屬湖廣
省乞分兩淮戍兵於本省沿海鎮遏樞密院官議沿江
軍馬係巴延阿珠安置勿令改動止於本省元管千戶
百戶軍內發兵鎮守之制可九月詔以兩廣海外四州
城池戍兵歲一更代往來勞苦給俸錢選良醫往治其
疾病者命三二年一更代之 三年二月調揚州翼鄧
新萬戶府全翼軍馬分屯蘄黃 大德元年三月陝西

平章政事圖魯卜領總帥府軍三千人收捕西番回詔
留總帥軍百人及階州舊軍圖沙瑪軍各二百人守階
州餘軍還元翼湖廣省請以保定翼萬人移鎮郴州樞
密院官議此翼乃張柔所領征伐舊軍宜遷入鄂州省
屯駐別調兵守之七月招收亡宋左右兩江土軍千人
從思明上思等處都元帥實喇布哈言也十一月河南
行省言前揚州立江淮行省江陵立荆湖行省各統軍
馬上下鎮過後江淮省移於杭州荆湖省遷於鄂州黃

河之南大江迤北汴梁古郡設立河南江北行省通管
江淮荆湖兩省元有地面近年併入軍馬通行管領所
屬之地大江最為緊要兩淮地險人頑宋亡之後始來
歸順當時沿江一帶斟酌緩急安置定三十一翼軍馬
鎮遏後遷調十二翼前去江南餘有一十九翼於內調
發止存原額十分中一二況兩淮荆襄自古隘要之地
歸附至今雖即寧靜宜慮未然乞照沿江元置軍馬遷
調江南翼分并各省所占本省軍人發選元翼仍前鎮

過省院官議以為沿江安置三十一翼軍馬之說本院無此簿書問之河南省官博囉罕其省亦無樞密院文卷內但稱至元十九年已延伊蘇特默齊等共擬其地安置三萬二千軍後增二千總三萬四千今悉令各省差占及逃亡事故者還充役足矣又博囉罕言去年已延點視河南省見有軍五萬二百之上又若還其占役事故軍人則共有七八萬人此數之外托歡太子位下有一千特默齊一千漢軍阿勒巴齊等哈喇妻亦在其

地設有非常皆可調用據各省占役總計軍官軍人一萬三千八百八十一名軍官二百九名軍人一萬三千六百七十二名內漢軍五千五百八十名新附軍八千二十八名蒙古軍六十四名江淞省占役軍官軍人四千九百五十七名湖廣省占役軍官軍人七千六百三名福建省占役軍官軍人一千二百七十二名江西省出征收捕未回新附軍四十九名悉令還役江淞省亦言河南行省見占本省軍人八千八百三十三名亦宜

遣還鎮遇有旨兩省各差官赴闕辨議 二年正月樞

密院言阿拉克岱托果斯所領漢人女直高麗等軍二千一百三十六名內有青海對陣者有久戍四五年者物力消乏乞於六衛軍內分一千二百人大同屯田軍八百人徹爾台軍二百人總二千二百人往代之制可三月詔各省合併鎮守軍福建所置者合為五十三所江淞所置者合為二百二十七所江西元立屯軍鎮守二百二十六所減去一百六十二所存六十四所 三

年三月沅州賊人嘯聚命以毘陽萬戶府鎮守辰州鎮巢
萬戶府鎮守沅州靖州上均萬戶府鎮守常州澧州五
年三月詔河南省占役江淅省軍一萬一千四百七十二名
除洪澤芍陂屯田外餘令發還元翼 七年四月調碭門四
川軍一千人鎮守羅羅斯 八年二月以江南海口軍少調
蘄縣王萬戶翼漢軍一百人甯萬戶翼漢軍一百人新附
軍二百人守慶元自納延來者蒙古軍三百人守定海
武宗至大二年七月樞密院臣言去年日本商船焚掠

慶元官軍不能敵江淞省言請以慶元台州沿海萬戶
府新附軍往陸路鎮守以蘄縣宿州兩萬戶府陸路漢
軍移就沿海屯鎮臣等議自世祖時巴延阿珠等相
地之勢制事之宜然後安置軍馬豈可輕動前行省
孟古岱等亦言以水陸軍互換遷調世祖有訓曰孟古
岱得非狂醉而發此言以水路之兵習陸路之伎驅步
騎之士而從風水之役難成易敗於事何補今欲禦備
姦宄莫若從宜於水路沿海萬戶府新附軍三分取一

與陸路蘄縣萬戶府漢軍相參鎮守從之 四年十月
以江浙省嘗言兩湖沿海瀕江隘口地接諸番海寇出
沒兼收附江南之後三十餘年承平日久將驕卒惰帥
領不得其人軍馬安置不當乞斟酌衝要去處遷調鎮
遏樞密院官議慶元與日本相接且為倭商焚毀宜如
所請其餘遷調軍馬事闕機務別議行之十二月雲南
八百媳婦大小徹里等作耗調四川省蒙古漢軍四千
人命萬戶囊嘉特部領赴雲南鎮守其四川省言本省

地方東南控接荆湖西北襟連秦隴阻山帶江密邇番蠻素號天險古稱極邊重地乞於存恤歇役六年軍內調二千人往從之

仁宗皇慶元年十一月詔江西省瘴地內諸路鎮守軍各移近地屯駐 延祐四年四月河南行省言本省地方寬廣關係非輕所屬萬戶府俱於臨江沿淮上下鎮守方面相離省府近者千里之上遠者二千餘里不測調度卒難相應況汴梁國家腹心之地設立行省別無

親臨軍馬較之江淞江西湖廣陝西四川等處俱有隨
省軍馬惟本省未蒙撥付樞密院以聞命於山東河北
蒙古軍河南淮北蒙古軍兩都萬戶府調軍一千人與
之十一月陝西都萬戶府言碣門特默齊軍一百五十
名鎮守多年乞放還元翼樞密院臣議彼中亦係要地
不宜放還止令於元翼起遣一百五十名三年一更鎮
守元調四川各翼漢軍一千名鎮守碣門黎雅亦令一
體更代

秦定四年三月陝西行省嘗言奉元建立行省行臺別無軍府唯有蒙古軍都萬戶府遠在鳳翔置司相離三百五十餘里緩急難用乞移都萬戶府於奉元置司軍民兩便及後陝西都萬戶府言自大德三年命移司酌中安置經今三十餘年鳳翔離天都土番甘肅俱各三千里地面酌中不移為便樞密議陝西舊例未嘗提調軍馬況鳳翔置司三十餘年不宜移動制可十二月河南行省言所轄之地東連淮海南限大江北抵黃河西

接關陝洞蠻草賊出沒與民為害本省軍馬俱在瀕海沿江安置遠者二千近者一千餘里乞以砲手弩軍兩翼移於汴梁并各萬戶府摘軍五千名益之樞密院臣言世祖命知地理省院官共議於瀕海沿江六十三處安置軍馬時汴梁未嘗置軍揚州衝要重地置五翼軍馬并砲手弩軍今親王托歡太子鎮遏揚州提調四省軍馬此軍不宜更動設若河南省果用軍則布達拉濟所管四萬戶蒙古軍內三萬戶在黃河之南河南省之

西一萬戶在河南省之南圖卜台所管五萬戶蒙古軍俱在黃河之北河南省東北阿拉克特穆爾安圖等兩侍衛蒙古軍在河南省之北共十一衛翼蒙古軍馬俱在河南省周圍屯駐又本省所轄一十九翼軍馬俱在河南省之南沿江置列果用兵即馳奏於諸軍馬內調發從之

元史卷九十九

元史卷九十九考證

宗仁衛沒入伊奇喇斯人一百戶與今所收蒙古子女
通三千戶清州徹匠二千戶合為行軍五千戶 按
三千戶上舊脫通字與行軍五千之數不合又合為
行軍五千戶句脫戶字並據經世大典增

成宗大德二年八月詔蒙古侍衛所管特默齊軍人子
第 按成宗元貞三年二月改元大德其四年實大
德二年也舊作元貞四年誤今改

圍宿軍各城門以蒙古漢軍列衛 按原本脫漢字據
經世大典增

世祖至元十七年七月勅更伐廣州鎮戍士卒 按原
本脫勅更代三字據經世大典增

至元二十二年詔改江淮江西元帥招討司為上中下
萬戶府下萬戶二十二翼 按志所載止二十翼世
祖本紀及續通考諸書亦少二翼據本卷後成宗元
年江浙行省奏建康太平保定萬戶府全翼軍馬云

云疑此處建康翼之下尚有太平保定二翼也

泰定四年以砲手弩軍兩翼移於汴梁并各萬戶府摘
軍五千名益之樞密院臣言世祖命知地理省院官
共議云云按原本於五十名下脫去益之及樞密
院臣言七字據經世大典增

欽定四庫全書蒼要卷六千四百七十九 史部

元史卷一百

明翰林學士亞中大夫知制誥兼修國史宋濂等修

志第四十八

兵三

馬政

西北馬多天下秦漢而下載籍蓋可考已元起朔方俗善騎射因以弓馬之利取天下古或未之有蓋其沙漠

萬里牧養蕃息太僕之馬殆不可以數計亦一代之盛
哉世祖中統四年設羣牧所隸太府監尋陞尚牧監又
陞太僕院改衛尉院院廢立太僕寺屬之宣徽院後隸
中書省典掌御位下大鄂爾多馬其牧地東越耽羅北
踰和林圖們西至甘肅南暨雲南等地凡一十四處自
上都大都以至諤尼巴雅爾濟蘭格爾周迴萬里無非
牧地馬羣或千百或三五十左股烙官印號大印子馬
印有必實古必達古庫卜沁諤斯庫鄂蘭等名牧人曰

哈噶齊哈喇齊有千戶百戶父子相承任事自夏及冬
隨地之宜行逐水草十月各至本地朝廷歲以九月十
月遣寺官馳驛閱視較其多寡有所產駒即烙印取勘
收除見在數目造蒙古回回漢字文冊以聞其總數蓋
不可知也凡病死者三則令牧人償大牝馬二二則償
二歲馬一一則償牝羊一其無馬者以羊駝牛折納太
廟祀事暨諸寺影堂用乳酪則供牝馬駕仗及宮人出
入則供尚乘馬車駕行幸上都太僕卿以下皆從先驅

馬出健德門外取其肥可乳者以行汰其羸瘦者還于羣自天子以及諸王百官各以都蘭氈置撒帳為取乳室車駕還京師太僕卿先期遣使徵馬五十鄂瑪堆來京師鄂瑪堆者承乳車之名也既至俾哈噶齊哈喇齊之在朝為卿大夫者親秣飼之日釀黑馬乳奉玉食謂之細乳每鄂瑪堆牝馬四十每牝馬一官給芻一束菽八升駒一給芻一束菽五升菽貴則其半以小稻充自諸王百官而下亦有馬乳之供鄂瑪堆如前之數而馬

減四之一謂之粗乳芻粟要旬取給於度支寺官亦以旬詣閑廐閱肥瘠又自世祖而下山陵各有鄂瑪堆取馬乳以供祀事號金陵擠馬越五年盡以與守山陵使者凡御位下正宮位下隨朝諸色目人員甘肅土番耽羅雲南占城蘆州河西亦奚卜薛和琳鄂諾吉魯爾阿勒哈瑪奇哈喇穆稜伊奇喇斯伊蘇呼察青海阿齊圖布爾罕濟蘭格爾等處草地內及江南腹裏諸處應有係官孳生馬牛駝驢羊點數之處一十四道牧地各千

戶百戶等名目如左

東路濟蘭格爾等處 諤尼巴雅爾上都周圍

哈喇穆稜等處 阿勒哈瑪奇等處 烏津川等處

阿齊圖布爾罕 甘州等處 左手永平等處 右

手固安州等處 雲南亦奚卜薛 蘆州 益都

和林圖們 高麗耽羅國

一濟蘭格爾等處御位下 濟蘭格爾地哈喇齊千戶

瑪們滿達勒塔奇爾巴爾斯和果賚達實特穆爾哈

刺諾海巴延岱雅爾達實薩題勒密實嘉琿台哈特

穆爾托多額森穆蘇額伯蘇塔本巴爾德默實布延

台薩都 昂吉和囉噶齊千戶下百戶托克托穆爾

烏魯古內托噶巴噶齊庫庫楚 齊齊克地實喇

卜 錫里衮尼魯衮鄂托克齊哈喇特穆爾 哈斯

罕地僧嘉努 諤尼巴雅爾斷頭山百戶哈濟

一 諤尼巴雅爾等處御位下 諤尼巴雅爾地哈喇齊

百戶哈喇托輝鄂都瑪勒雅克特穆爾阿勒楚爾額

森圖們伊嚕音特穆爾伊蘇克穆爾布拉克

大鄂爾多位下 奇拉爾果勒齊瑪們等 哈里雅

爾殼齊拜特穆爾 巴濟拉殼齊阿勒達爾 鄂齊

爾巴延殼齊嘉琿達等 達魯內伊爾格齊塔哩雅

齊等 巴濟拉阿都齊哈喇托輝 桃山太師伊徹

察喇彭楚克特穆爾等 巴延濟嚕肯阿都齊圖古

勒等 訶尼巴雅爾努圖克齊和尼齊

一哈喇穆稜等處御位下 阿實克翁格圖地巴圖爾

奇徹圖地濟勒岱 噶克察摩多 和斯諾爾哈達

伊勒噶雅薩題 衮蘇爾章昂吉哈達 錫里濟呼

爾都哈喇齊伯奇 沁諾爾哈喇齊呼魯蘇 伊嚕

徹辰 雲內州珠魯海齊察罕 察汗諾爾沁舒蘇

塔舒爾阿嚙罕 石頭山圖古勒 雅布哈尼嚕

充托克托穆爾 開城路黑水河布哈

大鄂爾多位下 諤勒哲

一阿勒哈瑪奇等處御位下 阿勒哈瑪奇地哈喇齊

百戶額布勒奇圖噶和斯特穆爾穆爾齊茂海布呼
齊博囉罕 吉魯爾地哈喇齊千戶青巴克實百戶
奇爾台蘇蘇勒鄂博塔爾布斯布爾察克圖伊蘇德勒
丹達爾伊埒默色孟古岱 鄂諾地琳沁喇嘛扎
卜哈扎爾布哈等

大鄂爾多位下 阿勒哈瑪奇昂輝等 庫庫地庫
庫齊勒等

一烏津川等處御位下 烏津川地哈喇齊千戶伊嚕

勒阿拉克特穆爾托克托徹爾 珠嚕海齊烏魯斯

瑪塔爾喀爾喀地哈喇齊千戶達實雅爾和拉罕察

克達納 庫庫地烏訥格齊孟古岱 吉魯爾巴喇

嚕齊巴爾默色

大鄂爾多位下 瑪塔喀爾喀齊哩克昆濟爾嚕呼

一阿齊圖布爾罕等處御位下 阿齊圖布爾罕地哈

嚕齊實訥 鄂爾沁扎木實保齊孟克薩喇 和囉

嚕昂吉托和齊 青海後輝罕達爾罕昂吉額森

鴻和爾布拉克昂吉默爾根呼魯蘇 雅爾噶地昂

吉哈坦和爾台默色 伊勒濟呼庫哈喇齊博囉

伊埒呼察西哈喇齊 達蘭蘇魯克哈喇齊巴沁濟

勒哈喇哈斯布拉克哈喇齊阿爾圖

大鄂爾多位下 吉魯爾和尼齊塔喇海

一甘州等處御位下 口千子哈喇布哈一所 鄂囉

齊一所 鄂拉實克阿拉善鄂都瑪勒 額伯爾沁

一所庫楚沁 塔坦地巴罕 雙和爾地劉子總管

庫庫蘇地 塔斯特穆爾等 甘州等處楊珠卜布
克呼地實喇濟蘇 扎哈圖屯田地安圖一所哈喇
巴爾呼圖克珠爾海齊額勒敏

一左手永平等處御位下 永平地哈喇齊千戶陸實
樂亭地球爾海齊阿都齊達喇齊穆爾默色伊爾格
齊瑪們薩里台 香河昂吉鼎珠伊瑪齊蘇克特穆
爾 河西務阿雅噶齊博囉岱 灤州哈喇齊托歡
徹爾桃花島青實保齊徹伯爾等

大鄂爾多位下 河西務諤德齊百戶滿濟勒噶

一右手固安州四集賽巴喇噶齊平章諾海為長 固

安州哈喇齊托歡徹爾哈噶齊和囉噶齊昂吉巴圖

爾 真定實保齊托克托 左衛哈喇齊塔卜岱

青州哈喇齊阿爾噶布哈 涿州哈喇齊博囉哈斯

一雲南亦奚卜薛特穆爾布哈為長

一蘆州

一益州哈喇齊呼圖克特穆爾

一和林圖們達實和爾為長

一高麗耽羅

屯田

古者寓兵於農漢魏而下始置屯田為守邊之計有國者善用其法則亦養兵息民之要道也國初用兵征討遇堅城大敵則必屯田以守之海內既一於是內而各衛外而行省皆立屯田以資軍餉或因古之制或以地之宜其為慮蓋甚詳密矣大抵勺陂洪澤甘肅瓜沙因

昔人之制其地利蓋不減於舊和琳陝西四川等地則因地之宜而肇為之亦未嘗遺其利焉至於雲南八番海南海北雖非屯田之所而以為蠻夷腹心之地則又因制兵屯旅以控扼之由是而天下無不可屯之兵無不可耕之地矣今故著其建置增損之概而內外所轄軍民屯田各以次列焉

樞密院所轄

左衛屯田 世祖中統三年三月調樞密院二千人於

東安州南永清縣東荒土及本衛元占牧地立屯開耕
分置左右手屯田千戶所為軍二千名為田一千三百
一十頃六十五畝

右衛屯田 世祖中統三年三月調本衛軍二千人於
永清益津等處立屯開耕仍分置左右手屯田千戶所
其屯軍田畝之數與左衛同

中衛屯田 世祖至元四年於武清香河等縣置立十
一年以各屯地界相去百餘里往來耕作不便遷於河

西務荒莊楊家口青臺楊家白等處其屯軍之數與左衛同為田一千三十七頃八十二畝

前衛屯田 世祖至元十五年九月以各省軍入備侍衛者於霸州保定涿州荒閒地土屯種分置左右手屯田千戶所屯軍與左衛同為田一千頃

後衛屯田 置立歲月與前衛同後以永清等處田畝低下遷昌平縣之太平莊泰定三年五月以太平莊乃世祖經行之地營盤所在春秋往來牧放衛士頭匹不

宜與漢軍立屯遂罷之止於舊立屯所耕作如故屯軍與左衛同為田一千四百二十八頃一十四畝

武衛屯田 世祖至元十八年發迤南軍人三千名於涿州霸州保定定興等處置立屯田分設廣備萬益等六屯別立農政院以領之二十二年罷農政院為司農寺自後與民相參屯種二十五年別立屯田萬戶府分管屯種軍人二十六年以屯軍屬武衛親軍都指揮使司兼領屯田事仁宗皇慶元年改屬衛率府後復歸之

武衛英宗至治元年命以廣備利民二千戶軍人所耕地土與左衛率府孟古岱屯田千戶所互相更易屯軍三千名為田一千八百四頃四十五畝

右翼屯田萬戶府世祖至元二十六年二月罷蒙古侍衛軍從人之屯田者別以鄂端巴實伯里回還漢軍及大名衛輝兩翼新附軍與前後二衛迤東還戍士卒合併屯田設左右翼屯田萬戶府以領之遂於大都路霸州及河間等處立屯開耕置漢軍左右手二千戶新

附軍六千戶所為軍二千五十一名為田一千三百九十九頃五十二畝

右翼屯田萬戶府其置立歲月與左翼同成宗大德元年十一月發真定軍人三百名於武清縣崔黃口增置屯田仁宗延祐五年四月立衛率府以本府屯田并屬詹事院後復歸之樞密分置漢軍千戶所三別置新附軍千戶所一為軍一千五百四十人為田六百九十九頃五十畝

忠翊侍衛屯田 世祖至元二十九年十一月命各萬戶府摘大同隆興太原平陽等處軍人四千人於音扎噶齊勤地面及紅城周迴置立屯田開耕荒田二千頃仍命西京宣慰司領其事後改立大同等處屯儲萬戶府以領之成宗大德十一年改侍衛親軍都指揮使司仍領屯田武宗至大四年以黃華嶺新附屯田軍一千人併歸本衛別立屯署是年改大同侍衛為中都威衛屬之徽政院分屯軍二千置弩軍翼止以二千人分置

左右手屯田千戶所黃華嶺新附軍屯如故仁宗延祐
二年遷紅城屯軍於古北口太平莊屯種五年復僉中
都威衛軍八百人於左都威衛所轄地內別立屯署七
年十二月罷左都威衛及太平莊白草營等處屯田復
於紅城周迴立屯仍屬中都威衛英宗至治元年始改
為忠翌侍衛屯田如故為田二千頃後移置屯所不知
其數

左右欽察衛屯田 世祖至元二十四年發本衛軍一

千五百一十二名分置左右手屯田千戶所及欽察屯田千戶所於清州等處屯田英宗至治二年始分左右欽察衛以左右手屯田千戶所分屬之文宗天曆二年創立龍翬侍衛復以隸焉為軍左手千戶所七百五名右手千戶所四百三十七名欽察千戶所八百名為田左手千戶所一百三十七頃五十畝右手千戶所二百一十八頃五十畝欽察千戶所三百頃

左衛率府屯田 武宗至大元年六月命於大都路漕

州武清縣及保定路新城縣置立屯田英宗至治元年以武衛與左衛率府屯田地界相離隔絕不便耕作命以兩衛屯田互更易之分置三翼屯田千戶所為軍三千人為田一千五百頃

宗仁衛屯田 英宗至治二年八月發五衛漢軍二千人於大寧等處創立屯田分置兩翼屯田千戶所為田二千頃

宣忠扈衛屯田 文宗至順元年十二月命收聚訖一

萬俄羅斯給地一百頃立宣忠扈衛親軍萬戶府屯田
依宗仁衛例

大司農司所轄

永平屯田總管府 世祖至元二十四年八月以北京
採取材木百姓三千餘戶於灤州立屯設官署以領其
事為戶三千二百九十為田一萬一千六百一十四頃
四十九畝

營田提舉司 不詳其建置之始其設立處所在大都

鄒州之武清縣為戶軍二百五十三民一千二百三十
五析居放良四百八十布呼齊二百三十二和卓一百
七十口獨居布呼齊一十二口哈喇穆爾丹八十二名
為田三千五百二頃九十三畝

廣濟署屯田 世祖至元二十二年正月以崔黃口空
城屯田歲澇不收遷於清滄等處後大司農寺以尚珍
署舊領屯夫二百三十戶歸之既又遷濟南河間五百
五十戶平灤真定保定三路屯夫四百五十戶併入本

屯為戶共一千二百三十為田一萬二千六百頃三十
八畝

宣徽院所轄

淮東淮西屯田打捕總管府 世祖至元十六年募民
耕漣海等州荒地官給禾種自備牛具所得子粒官得
十之四民得十之六仍免屯戶徭役屢欲中廢不果二
十七年所轄提舉司一十九處併為十二其後再併止
設八處為戶一萬一千七百四十三為田一萬五千一

百九十三頃三十九畝

豐閏署 世祖至元二十二年創立於大都路薊州之
豐閏縣為戶八百三十七為田三百四十九頃

寶坻屯 世祖至元十六年僉大都屬邑編民三百戶
立屯於大都之寶坻縣為田四百五十頃

尚珍署 世祖至元二十三年置立於濟寧路之兗州
為戶四百五十六為田九千七百一十九頃七十二畝

腹裏所轄軍民屯田

大同等處屯儲總管府屯田 成宗大德四年以西京黃華嶺等處田土頗廣發軍民九千餘人立屯開耕六年始設屯儲軍民總管萬戶府十一年放罷漢軍還紅城屯所止存民夫在屯仁宗時改萬戶府為總管府為戶軍四千二十民五千九百四十五為田五千頃

虎賁親軍都指揮使司屯田 世宗至元十七年十二月阿爾婁官人言近於瑪納齊圖沁納沁高州呼蘭達巴等處改置驛傳臣等議可於舊置驛所設立屯田從

之二十八年發虎賁親軍二千人入屯二十九年增軍
一千凡立三十四屯於上都置司為軍三千人佃戶七
十九為田四千二百二頃七十九畝

嶺北行省屯田 世祖至元二十一年併和林阿拉克
岱元領軍千人入五條河成宗元貞元年摘六衛漢軍
一千名赴青海屯田大德三年以五條河漢軍悉併入
青海仁宗延祐三年罷青海屯田復立屯於五條河六
年分揀蒙古軍五千人復屯田青海七年命依世祖舊

制青海五條河俱設屯田發軍一千人於五條河立屯
英宗時立屯田萬戶府為戶四千六百四十八為田六
千四百餘頃

遼陽等處行中書省所轄屯田

大寧路海陽等處打捕屯田所 世祖至元二十三年
以大寧遼陽平灤諸路拘刷漏籍放良布呼齊人戶及
僧道之還俗者立屯於瑞州之西瀕海荒地開耕設打
捕屯田總管府成宗大德四年罷之止立打捕屯田所

為戶元撥并召募共一百二十二為田二百三十頃五十畝

扶餘路屯田萬戶府 世祖至元二十九年十月以蠻軍三百戶女直一百九十戶於咸平府屯種三十年命本府萬戶呼嚕古岱領其事仍於楚勒罕拉林等處立屯三十一年罷萬戶府屯田仁宗大德二年撥蠻軍三百戶屬肇州蒙古萬戶府止存女直一百九十戶依舊立屯為田四百頃

金復州萬戶府屯田 世祖至元二十一年五月發新
附軍一千二百八十一戶於根敦扎卜立屯田二十六
年分京師應役新附軍一千人屯田哈斯罕關東荒地
三十年以伊嚕音特穆爾塔斯哈雅兩萬戶新附軍一
千三百六十戶併入金復州立屯耕作爲戶三千六百
四十一爲田二千五百二十三頃

肇州蒙古屯田萬戶府 成宗元貞元年七月以納延
布拉噶齊及打魚碩達勒達女直等戶於肇州旁近地

開耕為戶布拉噶齊二百二十戶碩達勒達八十戶歸附軍三百戶續增漸丁五十二戶田一千五百四十頃

河南行省所轄軍民屯田

南陽府民屯 世祖至元二年正月詔孟州之東黃河之北南至八柳樹枯河徐州等處凡荒閒地土可令阿珠阿嘍罕等所領士卒立屯耕種并摘各萬戶所管漢軍屯田六年以攻襄樊軍餉不足發南京河南歸德諸路編民二萬餘戶於唐鄧申裕等處立屯八年散還元

屯戶別僉南陽諸色戶計立營田使司領之尋罷改立南陽屯田總管府後復罷止隸有司為戶六千四十一為田一萬六百六十二頃七畝

洪澤萬戶府屯田 世祖至元二十三年立洪澤南北三屯設萬戶府以統之先是江淮行省言國家經費糧儲為急今屯田之利無過兩淮況勺陂洪澤皆漢唐舊嘗立屯之地若令江淮新附漢軍屯田可歲得糧百五十餘萬石至是從之三十二年罷三屯萬戶止立洪澤

屯田萬戶府以統之其置立處所在淮安路之白水塘
黃家疇等處為戶一萬五千九百九十四名為田三萬
五千三百一十二頃二十一畝

芍陂屯田萬戶府 世祖至元二十一年二月江淮行
省言安豐之芍陂可溉田萬餘頃乞置三萬人立屯中
書省議發軍士二千人姑試行之後屯戶至一萬四千
八百八名

德安等處軍民屯田總管府 世祖至元十八年以各

翼取到漢軍及各路拘收手號新附軍分置十屯立屯田萬戶府三十一年改立總管府為民九千三百七十五名軍五千九百六十五名為田八千八百七十九頃九十六畝

陝西等處行中書省所轄軍民屯田

陝西屯田總管府 世祖至元十一年正月以安西王府所管編民二千戶立櫟陽涇陽終南渭南屯田十八年立屯田所十九年以軍站屯戶拘收為齊哩克昆戶

放還而無所歸者籍為屯戶立安西平原屯田設提領所以領之二十九年立鳳翔鎮原彭原屯田放罷至元十年所僉接應成都延安軍人置立民屯設立屯田所尋改為軍屯令千戶所管領三十年復更設民屯為戶鳳翔一千一百二十七戶鎮原九百一十三戶櫟陽七百八十六戶後存六百五十戶涇陽六百九十六戶後存六百五十八戶彭原一千二百三十八戶安西七百二十四戶後存二百六十二戶平涼二百八十八戶終

南七百七十一戶後存七百一十三戶渭南八百一十
一戶後存七百六十六戶為田鳳翔九十頃一十二畝
鎮原四百二十六頃八十五畝櫟陽一千二十頃九十
九畝涇陽一千二十頃九十九畝彭原五百四十五頃
六十八畝安西四百六十七頃七十八畝平涼一百一
十五頃二十畝終南九百四十三頃七十六畝渭南一
千二百二十二頃三十一畝

陝西等處萬戶府屯田 世祖至元十九年二月以蓋

屋南係官荒地發歸附軍立孝子林張馬村軍屯二十年以南山把口子巡哨軍人八百戶於藍屋之杏園莊寧州之大昌原屯田二十一年發文州鎮戍新附軍九百人立亞柏鎮軍屯復以燕京戍守新附軍四百六十三戶於德順州之威戎立屯開耕為戶孝子林屯三百一戶張馬村屯三百一十三戶杏園莊屯二百三十三戶大昌原屯四百七十四戶亞柏鎮屯九百戶威戎屯四百六十三戶為田孝子林二十三頃八十畝張馬村

七十三頃八十畝杏園莊一百一十八頃三十畝大昌
原一百五十八頃七十九畝亞柏鎮二百六十八頃五
十九畝威戎一百六十四頃八十畝

桂齊延安總管府屯 世祖至元十九年以拘收贖身
放良布呼齊及漏籍戶計於延安路特默齊草地屯田
為戶二千二十七為田四百八十六頃

甘肅等處行中書省所轄軍民屯田

寧夏等處新附軍萬戶府屯田 世祖至元十九年三

月發迤南新附軍一千三百八十二戶往寧夏等處屯
田二十一年遣塔塔喇千戶所管軍人九百五十八戶
屯田為田一千四百九十八頃三十三畝

管軍萬戶府屯田 世祖至元十八年正月命肅州沙
州瓜州置立屯田先是遣都元帥劉恩往肅州諸郡視
地之所宜恩還言宜立屯田遂從之發軍於甘州黑山
子滿峪泉水渠鴨子翅等處立屯田為戶二千二百九
十為田一千一百六十六頃六十四畝

寧夏營田司屯田 世祖至元八年正月僉發已未年
隨州鄂州投降人民一千一百七戶往中興居住十一
年編為屯田戶凡二千四百丁二十三年續發漸丁得
三百人為田一千八百頃

寧夏路放良官屯田 世祖至元十一年從安撫司請
以招收放良人民九百四戶編聚屯田為田四百四十
六頃五十畝

額齊訥屯田 世祖至元十六年調歸附軍入於甘州

十八年以充屯田軍二十二年遷甘州新附軍二百人
往屯額齊訥合即渠開種為田九十一頃五十畝

江西等處行中書省所轄屯田

贛州路南安寨兵萬戶府屯田 成宗大德二年正月
以贛州路所轄信豐會昌龍南安遠等處賊人出沒發
寨兵及宋舊役弓手與抄數漏籍人戶立屯耕守以鎮
遏之為戶三千二百六十五為田五百二十四頃六十

八畝

江浙等處行中書省所轄屯田

汀漳屯田 世祖至元十八年以福建調軍糧儲費用
依腹裏例置立屯田命管軍總管鄭楚等發鎮守士卒
年老不堪備征戰者得百有十四人又募南安等縣居
民一千八百二十五戶立屯耕作成宗元貞三年命於
南詔黎舍各立屯田摘撥見戍軍人每屯置一千五百
名及將所招陳弔眼等餘黨入屯與軍人相參耕種為
戶汀州屯一千五百二十五名漳州屯一千五百一十

三名為田汀州屯二百二十五頃漳州屯二百五十頃
高麗國立屯

高麗屯田 世祖至元七年創立是時東征日本欲積
糧餉為進取計遂以王綽洪察球爾等所管高麗戶二
千人及發中衛軍二千人合博索府咸平府軍各一千
人於王京東寧府鳳州等一十處置立屯田設經畧司
以領其事每屯用軍五百人

四川行省所轄軍民屯田二十九處

廣元路民屯 世祖至元十三年從利路元帥言廣元

實東西兩川要衝支給浩繁經理係官田畝得九頃六

十畝遂以褒州刷到無主人人口偶配為十戶立屯開種

十八年發新得州編民七十七戶屯田為戶共八十七

敘州宣撫司民屯 世祖至元十一年命西蜀四川經

畧使起立屯田十五年僉長寧軍富順州等處編民四

百七十五戶立屯耕種十九年續僉一百六十戶二十

年敘州僉民一千九百戶二十五年富順州復僉民六

百八戶增入舊屯二十七年取勘析出屯戶得二百八十四成宗元貞三年復放罷站戶一千一十七戶依舊屯田總之為戶四千四百四十四

紹慶路民屯 世祖至元十九年於本路未當差民戶內僉二十三戶置立屯田二十年於彭水縣籍管萬州寄戶內僉撥二十戶二十一年僉彭水縣未當差民戶三十二戶增入二十六年屯戶貧乏者多負逋復僉彭水縣編民一十六戶補之為戶九十一

嘉定路民屯 世祖至元十九年僉亡宋編民四戶置
立屯田成宗元貞元年撥成都義士軍八戶增入為戶
一十二

順慶路民屯 世祖至元十二年僉順慶民三千四百
六十八戶置立屯田十九年復於民戶內差撥一千三
百二十六戶置民屯二十年復僉二百一十二戶增入
總之五千一十六戶

潼川府民屯 世祖至元十一年僉本府編民及義士

軍二千二百二十四戶立屯十三年復僉民一百四十
二戶二十一年行省遣使於遂寧府擇監夫之老弱廢
疾者得四十六戶僉充屯戶總之二千四百一十二戶
夔路總管府民屯 世祖至元十一年置累僉本路編
民至五千二十七戶續於新附軍內僉老弱五十六戶
增入

重慶路民屯 世祖至元十一年置累於江津巴縣瀘
州忠州等處僉撥編民二千三百八十七戶并召募共

三千五百六十六戶

成都路民屯 世祖至元十二年僉陰陽人四十戶辦

納屯糧二十二年續僉瀘州編民九千七戶充屯田戶
三十一年續僉千戶高德所管民一十四戶

保寧萬戶府軍屯 世祖至元二十六年保寧府言本
管軍人一户或二丁三丁父兄子弟應役實為重併若
又遷於成都屯種去家隔遠逃匿必多乞令本府在營
士卒及夔路守鎮軍人止於保寧沿江屯種從之僉軍

一千二百名二十七年發屯軍一百二十九人從萬戶
伊蘇岱爾西征別僉漸丁軍人入屯為戶一千三百二
十九名為田一百一十八頃二十七畝

敘州等處萬戶府軍屯 成宗元貞二年改立敘州軍
屯遷遂寧屯軍二百三十九人於敘州宣化縣喞口上
下荒地開耕為田四十一頃八十三畝

重慶五路守鎮萬戶府軍屯 仁宗延祐七年發軍一
千二百人於重慶路三堆中嶠趙市等處屯耕為田四

百二十頃

夔路萬戶府軍屯 世祖至元二十一年從四川行省
議除沿邊重地分軍鎮守餘軍一萬人命官於成都諸
處擇膏腴地立屯開種為戶三百五十一人為田五十
六頃七十畝凡創立十四屯

成都等路萬戶府軍屯於本路崇慶州義興鄉楠木園
置立為戶二百九十九人為田四十二頃七十畝

河東陝西等路萬戶府軍屯 置立於灌州之青城陶

埧及崇慶州之大柵頭等處為戶一千一百二十八名
為田二百八頃七畝

廣安等處萬戶府軍屯 置立於成都路崇慶州之七
寶埧為戶一百五十名為田二十六頃二十五畝

保寧萬戶府軍屯 置立於重慶州晉源縣之金馬為
戶五百六十四名為田七十五頃九十五畝

敘州萬戶府軍屯 置立於灌州之青城為戶二百二
十一名為田三十八頃六十七畝

五路萬戶府軍屯 置立於成都路崇慶州之大柵鎮
孝感鄉及灌州青城縣之懷仁鄉為戶一千一百六十
一名為田二百三頃一十七畝

興元金州等處萬戶府軍屯 置立於崇慶州晉源縣
孝感鄉為戶三百四十四名為田五十六頃

隨路巴圖萬戶府軍屯 置立於灌州青城溫江縣為
戶八百三十二名為田一百六十二頃五十七畝

舊附等軍萬戶府軍屯 置立於灌州青城縣崇慶州

等處為戶一千二名為田一百二十九頃五十畝

礮手萬戶府軍屯 置立於灌州青城縣龍池鄉為戶

九十六名為田一十六頃八十畝

順慶軍屯 置立於晉源縣義興鄉江源縣將軍橋為

戶五百六十五名為田九十八頃八十七畝

平陽軍屯 置立於灌州青城崇慶州大柵頭為戶三

百九十八名為田六十九頃六十五畝

遂寧州軍屯為戶二千名為田三百五十頃

嘉定萬戶府軍屯 世祖至元二十一年摘蒙古漢軍
及嘉定新附軍三百六十人於崇慶州青城等處屯田
二十八年還之元翼止餘屯軍一十三名為田二頃二
十七畝

順慶等處萬戶府軍屯 世祖至元二十六年發軍於
泇江下流漢初等處屯種為戶六百五十六名為田一
百一十四頃八十畝

廣安等處萬戶府軍屯 世祖至元二十七年撥廣安

舊附漢軍一百一十八名於新明等處立屯開耕為田二十頃六十五畝

雲南行省所轄軍民屯田一十二處

威楚提舉司屯田 世祖至元十五年於威楚提舉鹽使司拘刷漏籍人戶充民屯本司就領其事與中原之制不同為戶三十三為田一百六十五雙

大理金齒等處宣慰司都元帥府軍民屯 世祖至元十二年命於所轄州縣拘刷漏籍人戶得六千六十有

六戶置立屯田十四年僉本府編民四百戶益之十八年續僉永昌府編民一千二百七十五戶增入二十六年立大理軍屯於爨犂軍內撥二百戶二十七年復僉爨犂軍人二百八十一戶增入二十八年續增一百一十九戶總之民屯三千七百四十一戶軍屯六百戶為田軍民已業二萬二千一百五雙

鶴慶路軍民屯田 世祖至元十二年僉鶴慶路編民一百戶立民屯二十七年僉爨犂軍一百五十二戶立

軍屯為田軍屯六百八雙民屯四百雙俱已業

武定路總管府軍屯 世祖至元二十七年以雲南戍
軍糧餉不足於和曲祿勸二州爨犂軍內僉一百八十
七戶立屯耕種為田七百四十八雙

威楚路軍民屯田 世祖至元十五年立威楚民屯拘
刷本路漏籍人戶得一千一百一戶內八百六十六戶
官給無主荒田四千三百三十雙餘戶自備已業田一
千一百七十五雙二十七年始立屯軍於本路爨犂軍

內僉三百九十九戶內一十五戶官給荒田六十雙餘
戶自備已業田一千五百三十六雙

中慶路軍民屯田 世祖至元十二年置立中慶民屯
於所屬州縣內拘刷漏籍人戶得四千一百九十七戶
官給田一萬七千二十二雙自備已業田二千六百二
雙二十七年始立軍屯用纍燹軍人七百有九戶官給
田二百三十二雙自備已業田二千六百一雙

曲靖等處宣慰司兼管軍萬戶府軍民屯田 世祖至

元十二年立曲靖路民屯拘刷所轄州郡諸色漏籍人戶七百四十戶立屯十八年續僉民一千五百戶增入其所耕之田官給一千四百八十雙自備已業田三千雙十二年立澂江民屯所僉屯戶與曲靖同凡一千二百六十戶二十六年始立軍屯於爨棘軍內僉一百六十六戶二十七年復僉一百二十六戶增入十二年立仁德府民屯所僉屯戶與澂江同凡八十戶官給田一百六十雙二十六年始立軍屯僉爨棘軍四十四戶二

十七年續僉五十六戶增入所耕田畝四百雙俱係軍人已業

烏撒宣慰司軍民屯田 世祖至元二十七年立烏撒路軍屯以爨棘軍一百一十四戶屯田又立東川路民屯屯戶亦係爨棘軍人八十六戶皆自備已業

臨安宣慰司兼管軍萬戶府軍民屯田 世祖至元十二年立臨安民屯二處皆於所屬州縣拘刷漏籍人戶開耕宣慰司所管民屯三百戶田六百雙本路所管民

屯二千戶田三千四百雙二十七年續立爨楚軍屯為戶二百八十人為田一千一百五十二雙

梁千戶翼軍屯 世祖至元三十年梁王遣使詣雲南行省言以漢軍一千人置立屯田三十一年發三百人備鎮戍巡邏止存七百人於烏蒙屯田後遷於新興州為田三千七百八十九雙

羅羅斯宣慰司兼管軍萬戶府軍民屯田 世祖至元二十七年立會通民屯屯戶係爨楚土軍二戶十六年

立建昌民屯撥編民一百四戶二十三年發爨棘軍一
百八十戶立軍屯是年又立會川路民屯發本路所轄
州邑編民四十戶十六年立德昌路民屯發編民二十
一戶二十年始立軍人發爨棘軍人一百二十戶

烏蒙等處屯田總管府軍屯 仁宗延祐二年立烏蒙

軍屯先是雲南行省言烏蒙乃雲南咽喉之地別無屯
戍軍馬其地廣濶土脈膏腴皆有古昔屯田之蹟乞發
輝和爾及新附漢軍屯田備邊至是從之為戶軍五千

人為田一千二百五十頃

湖廣等處行中書省所轄屯田三處

海北海南道宣慰司都元帥府民屯 世祖至元三十年召募民戶并發新附士卒於海南海北海北等處置立屯田成宗元貞元年以其地多瘴癘縱屯軍二千人還各翼留二千人與召募民戶屯種大德三年罷屯田萬戶府屯軍悉令還役止令民戶八千四百二十八戶屯田瓊州路五千一十一戶雷州路一千五百六十六戶

高州路九百四十八戶化州路八百四十三戶廉州路
六十戶為田瓊州路二百九十二頃九十八畝雷州路
一百六十五頃五十一畝高州路四十五頃化州路五
十五頃二十四畝廉州路四頃八十八畝

廣西兩江道宣慰司都元帥撞兵屯田 成宗大德二
年黃聖許叛逃之交趾遺棄水田五百四十五頃七畝
部民有呂瑛者言募牧蘭等處及融慶溪洞徭撞民丁
於上浪忠州諸處開屯耕種十年平大任洞賊黃德寧

等以其地所遺田土續置藤州屯田為戶上浪屯一千二百八十二戶忠州屯六百一十四戶那扶屯一千九百八十九戶雷留屯一百八十七戶水口屯一千五百九十九戶續增藤州屯二百八頃一十九畝

湖南道宣慰司衡州等處屯田 世祖至元二十五年調德安屯田萬戶府軍士一千四百六十七名分置衡州之清化永州之烏符武岡之白倉置立屯田二十七

年募衡陽縣無土產居民得九戶增入清化屯為戶清

化屯軍民五百九戶烏符屯軍民五百戶白倉屯同為
一屯化屯一百二十頃一十九畝烏符屯一百三頃五
十畝白倉屯八十六頃九十二畝

元史卷一百

元史卷一百考證

屯田樞密院所轄右翼屯田萬戶府別置新軍千戶所
一 按一字舊訛以今改

忠翊侍衛屯田 按忠翊舊訛中翊今據前卷改

左右欽察衛屯田為軍左手千戶所七百五名 按左
手千戶所七百五名經世大典作二百七十五名

肇州蒙古屯田萬戶府田一千五百四十頃 按原本
脫去田一千五百四十頃八字據經世大典補

紹慶路民屯於本路未當差民戶內僉二十三戶 按
二十三戶舊訛二十三名據下文為戶九十一之數
核改

大理金齒等處宣慰司都元帥府軍民屯命於所轄州
縣拘刷漏籍人戶得六千六十有六戶 按經世大
典作二千六十有六戶

烏蒙等處屯田總管府軍屯乞發輝和爾及新附漢軍
屯田備邊 按備邊二字舊訛作俱過今改

湖廣等處行中書省所轄屯田三處 按舊說二處據

下文改

海北海南道宣慰司都元帥府民屯田二千人與召募
民戶屯種 按民戶舊說民之今改



總校官編修臣吳紹濬